

Olwaandiko lwa kábili lwa Yohana Obweébeembezi

Omu lwaandiko lwa kábili, Yohana naazeendelela kubatiimbya emiganya abeekiliza, babone kutúula omu kweétegeezele amazima ne engoonzi. Káandi naazeendelela kubahana bataákweékomya na abeégesa be ebisuba. Naakomeenteleza nka nikwo abeekiliza babe abeétegeezelezi na balame omu kwiikiliza kwa amazima.

Empola

¹ Íinye omunyaampala we ekelezia, niinkwaandikila íiwe munyaányeene óogwo otoziibwe na Múungu, hamo na abáana baawe.* Áabo nnyeénda omu mazima, na ti íinye nyeénka, náho na abáandi bóona áabo abalikusoombookelwa ago mazima.

² Nitubeénda habwo kuba íichwe neemwe nitusoomboókelwa ago mazima agali omuli íichwe, káandi nágo nigazeendelela kwiikala omuli íichwe obucha no obuchiile.

³ Mbwéenu, embabazi, echiganyizi no obuhóolo kuluga hali Isíichwe Múungu no Omutábani Yeézu Kristu, nibiba hamo neechwe omu mazima ne engoonzi.

* **1:1 1:1 Munyaányeene óogwo otoziibwe na Múungu, hamo na abáana baawe:** Yohana naagaamba habwe ekelezia bunaanka hamo na abeekiliza baáyo.

Kweendana nikwo okugomookela ebilangilo bya Múungu

⁴ Nkanulilwa bwooli kubona nka nikwo omu baana baawe balimo abalikweékomya amazima, nka nikwo Isíichwe Múungu yaátulagiile.

⁵ No óobu, munyaányeene, omu lwaandiko olu, niinkusába nka nikwo oyékomye echilagilo cho kweendana. Echilagilo echi ti chisha, náho nicho echo nyini chi twaabele twiinácho kulugiilila aha bubaandizo, nka nikwo tweendane íichwe omuli íichwe nyini.

⁶ No kweendana nikwo oku, tutuúle omu kugomookela ebilangilo bya Múungu. Echi nicho echilagilo chi mwaáhuliile kulugiilila ha bubaandizo, mutuúle ha kweendana.

Mutaákubaangisa ababéehi

⁷ Niimbagaambila iíntyó, ha kuba ababéehi béenzi balekile amazima beésuululukize omu nsi, tibakwiikiliza nka nikwo Yeézu Kristu akeeza omu nsi yaaba omuuntu mále nibahabisa abaantu abáandi bityo. Omuuntu weéna wéena óogwo alikugaamba aátyo, ogwo niwe omubéehi, na káandi no omuhakanisa wa Kristu.

⁸ Mbweénu, mweétegeeleze, kuba ebikolwa byáanyu bitaákwiiza kufwa busa, náho mubóne kwiinaankula empeéla yáanyu ekobile kuluga ahali Múungu.

⁹ Weéna wéena óogwo atakuzeendelela obuteékomya améégeso ga Kristu, káandi akoongelaho éebye, ogwo tayina Múungu. Náho, óogwo alikuzeendelela no kweékomya améégeso

1:5 1:5 Osome Yohana 13:34. **1:7 1:7** Osome 1 Yohana 4:2-3.

1:8 1:8 Osome 1 Abakorinto 3:10-15.

ga Kristu, ogwo ayináze Isíichwe Múungu hamo no Omutábani Yeézu Kristu.

¹⁰ Kábilaaba omuuntu naayiza hali ímwe óogwo atakweégesa ago, mutamwaángisa omu maka gáanyu, na káandi mutamwaángalucha.

¹¹ Omuuntu ogwo alaamwaángalucha, ogwo naába yaákobana náze omu bikolwa byo obuzilwa éebyo alikukola.

Ebigaambo byo kulaga

¹² Nnyina amagaambo méenzi, náho tíinkweenda kugaándika ago góona aha lupapula no obwíino. Náho niintegeza kwiiza kubayeélela no kuhooya neemwe butúnu, twéena tubone kunulilwa bwooli.

¹³ Abáana ba munyaányoko ogwo ayaatoozi-ibwe na Múungu,† nibakwaángalucha.

† **1:13 1:13 Abáana ba munyaányoko ogwo ayaatooziibwe na Múungu:** Yohana naahoóyela ekelezia hamo na abeekiliza baáyo áaho yaabele aáli.

Endagano Eénsha omu Chiziinza
Portions of the Holy Bible in the Zinza language of
Tanzania: Endagano Eénsha omu Chiziinza (New
Testament+)

copyright © 2024 Wycliffe Bible Translators, Inc.

Language: (Zinza)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

ec04e043-ebb2-5393-a814-029b879f102a